

## **Wanita Menurut Hamka Di Dalam Tafsir Al-Azhar: Kajian Terhadap Surah An-Nisa'**

Abdul Hafiz Haji Abdullah & Siti Rohaya Sudiro

Fakulti Pendidikan,

Universiti Teknologi Malaysia

**Abstrak :** Kajian ini dilakukan bertujuan mengkaji pandangan Hamka terhadap wanita yang telah diadaptasikan dalam Tafsir Al-Azhar. Ia bertujuan untuk melihat dan menilai sejauhmana Hamka mencurahkan idea dan pengalamannya dalam membincangkan hal ehwal wanita ke dalam tafsir karangannya. Secara umumnya penyelidik selain mengetengahkan pandangannya terhadap wanita dari aspek sosial iaitu perkahwinan, talak dan harta pusaka yang terdapat dalam surah an-Nisa', penyelidik juga bertujuan memperkenalkan Hamka sebagai seorang pentafsir. Untuk kajian ini, penyelidik telah menggunakan kajian perpustakaan sepenuhnya. Di akhir kajian, beberapa cadangan telah dikemukakan kepada pihak-pihak tertentu untuk memartabatkan hak wanita.

Katakunci : Hamka, Tafsir Al-Azhar

### **Pendahuluan**

Al-Quran atau nama lainnya al-Kitab, adalah wahyu yang diturunkan oleh Allah SWT kepada Rasulullah SAW dengan melalui perantaraan Malaikat Jibril untuk disampaikan kepada manusia. Al-Quran merupakan mukjizat terbesar yang diturunkan kepada Nabi Muhammad SAW. Tertulis pada mushaf dan membacanya dikira ibadah. Al-Quran merupakan anugerah Allah SWT buat seluruh hambanya. Sebagaimana firman Allah SWT (Abdullah Basmeih, 2001: 334):

وَهَذَا كِتَابٌ أَنْزَلْنَاهُ مُبَارَكٌ فَاتَّبِعُوهُ وَأَنْقُوا الْعَلَمَنَ تُرْحَمُونَ

Terjemahannya:

*“Dan ini sebuah Kitab (al-Quran) yang Kami turunkan, yang ada berkatnya (banyak manfaatnya). Oleh itu, hendaklah kamu menurutnya; dan bertaqwalah (kepada Allah), mudah-mudahan kamu beroleh rahmat.”*

Surah al-An‘am (6): 155

Secara dasarnya kita lihat penterjemahan dan pentafsiran seakan-akan sama akan tetapi terdapat perbezaan yang nyata antara keduanya. Akan tetapi dapat kita fahami tujuan mentafsir dan menterjemah adalah untuk memberi kefahaman yang mendalam kepada umat Islam tentang isi kandungan al-Quran.

### **Pernyataan masalah**

Berdasarkan latar belakang masalah yang dinyatakan berkaitan permasalahan wanita. Penyelidik melakukan kajian terhadap wanita menurut Hamka di dalam Tafsir Al-Azhar khusus mengkaji surah an-Nisa'. Hal ini bertujuan untuk melihat apakah pandangan dan perbincangan Hamka berkaitan wanita terutama dari tiga aspek utama iaitu perkahwinan, talak dan harta pusaka. Ini kerana Hamka merupakan seorang ulama yang memahami keadaan di Nusantara, dan pandangan Hamka boleh dijadikan rujukan bagi menyelesaikan permasalahan tersebut.

Penyelidik merasakan Tafsir Al-Azhar hasil karangan Hamka mempunyai banyak keistimewaan yang perlu diketahui oleh masyarakat. Maka kerana itulah penyelidik terpanggil

untuk melakukan sedikit penyelidikan ke atas pemikiran Hamka di dalam Tafsir Al-Azhar dalam membicarakan mengenai wanita.

### **Objektif Kajian**

Objektif kajian ini adalah seperti berikut:

- a) Mengkaji pandangan Hamka terhadap wanita di dalam surah an-Nisa' berkaitan hal ehwal perkahwinan.
- b) Mengenal pasti pandangan Hamka terhadap wanita di dalam surah an-Nisa' berkaitan talak.
- c) Mengenal pasti pandangan Hamka terhadap wanita di dalam surah an-Nisa' berkaitan harta pusaka.

### **Kepentingan Kajian**

Penyelidik berminat untuk memilih tajuk ini sebagai bahan kajian di dalam penyelidikan kerana seperti yang kita ketahui bahawa Hamka terkenal sebagai ulama besar di alam Melayu. Hamka merupakan ulama yang terkemuka masa kini yang sangat berpengaruh terhadap perkembangan dakwah tidak hanya di Indonesia malah di Nusantara.

Penyelidik juga memilih tajuk ini kerana dapatan kajian ini mempunyai beberapa kepentingan tertentu amnya kepada umat Islam dan khususnya kepada wanita Islam dalam meningkatkan lagi pengetahuan yang sedia ada. Di antara kepentingan kajian yang disenaraikan ialah:

- a) Sebagai rujukan dan panduan untuk wanita Islam.
- b) Sebagai satu alternatif untuk menyampaikan dakwah kepada umat Islam.
- c) Dapat mendedahkan kepada masyarakat terutamanya wanita tentang kedudukan, peranan dan hak mereka sebagai wanita Islam serta member kesedaran kepada mereka tanggungjawab mereka seperti hak mereka dalam kekeluargaan.
- d) Dapat memberi pemahaman yang lebih jelas kepada seluruh masyarakat tentang isu yang berkaitan dengan wanita selain dapat memudahkan masyarakat memahami hak wanita yang sebenar.

### **Metode Penentuan Subjek**

Metode penentuan subjek ini bertujuan untuk menentukan halatuju sesebuah kajian yang dilakukan. Penyelidik menggunakan metode *sampling* dalam menetapkan subjek penelitian. Perkara ini dilakukan melihat kepada besarnya populasi yang menjadi subjek penelitian ini. Menurut Wan Hashim *et al2* ia bermaksud, seseorang penyelidik cuba memilih satu kumpulan individu yang kecil bilangannya dan individu yang dipilih pula mewakili keseluruhan penduduk yang lebih besar bilangannya.

Penyelidik menggunakan surah an-Nisa' sebagai metode penentuan subjek kajian. Ia sebagai sampel kepada 113 surah-surah yang lain yang terdapat di dalam al-Quran.

### **Keputusan**

#### **Undang-undang poligami**

Hamka membolehkan poligami tetapi dengan menetapkan undang-undang untuk kemaslahatan masyarakat. Sebagaimana kenyataan Hamka di dalam bukunya:

“Tetapi kalau masyarakat itu tidak dipimpin oleh penguasa yang mengerti roh syari‘at, niscaya mereka akan berpoligami menurut sesuka hatinya saja. Mereka akan berpegang kepada

kebolehan yang diberikan agama, tidak mengingat syarat-syarat yang ditentukannya. Dan di tanah air kita di Indonesia Poligami sesuka hati itu banyak terdapat, baik di kalangan orang awam, bahkan dalam kalangan terpelajar sendiri. Sehingga “Poligami” menjadi tempat lari bagi melepaskan nafsu. Sebab itu tidak ada salahnya jika pemerintah Republik Indonesia mengadakan undangundang, bukan untuk memberantas Poligami karena yang demikian tidaklah sesuai dengan kepribadian bangsa yang beragama Islam, padahal UUD3 1945 adalah dijewai oleh “Piagam Jakarta”. Menghapuskan Poligami adalah melanggar agama dan melanggar kenyataan dalam masyarakat. Yang perlu ialah menertibkan Poligami persis menurut isi kedua ayat yang menjadi sumber hukum itu ialah Allah dan Rasul-Nya.”

Undang-undang ini perlu bagi menyekat mereka dari menyalahgunakan keharusan berpoligami tersebut. Ini kerana poligami merupakan syariat dan bukanlah sesuatu yang boleh dilakukan sewenang-wenangnya.

### **Faktor berlaku poligami**

Poligami bertujuan demi kepentingan umat dan salah satu usaha untuk membimbing wanita, untuk meningkatkan dari suasana kehidupan yang diliputi oleh kegelisahan, kehinaan dan terlantar, menuju kehidupan berkeluarga yang mulia, dan keibuan yang mulia, di mana wanita merasakan kebahagiaan, kesucian dan kemuliaan di bawah naungannya. Poligami juga merupakan salah satu penerapan dari kebebasan wanita, dan terlaksananya apa yang dikehendakinya, kerana sebenarnya lelaki itu tidak berpoligami tanpa kemahuan wanita.

### **Masyarakat “Keibuan”**

Islam telah menghukumkan keharusan berpoligami, namun terdapat poligami yang berlangsung kerana mengikut adat. Masyarakat “Keibuan” adalah adat yang melebihkan pada keturunan ibu yang berlaku pada masyarakat Minangkabau. Sebagaimana yang berlaku dalam rumah tangga cara Minangkabau lama adalah rumah tangga Adat Jahiliyyah.<sup>6</sup> Ini kerana di dalam masyarakat Minangkabau dari segi agama mereka membahagikan adat kepada dua bahagian, iaitu: Adat Jahiliyyah dan Adat Islamiyah.<sup>7</sup>

### **Mendirikan adat**

Bagi masyarakat Minangkabau, mendirikan adat bermaksud menunaikan hak dan tanggungjawab terlebih dahulu kepada suku mereka. Ini kerana bagi mereka, dengan mendirikan adat akan dapat menjaga kedudukan mereka di tanah adat. Kedudukan ini merupakan gelaran yang akan mereka gunakan dalam persukuan mereka.

### **Orang Semenda**

Semenda bermaksud pertalian kekeluargaan yang disebabkan oleh perkahwinan. Lelaki dalam adat Minangkabau, apabila mereka dijemput secara khusus untuk dijadikan menantu, maka mereka dipanggil sebagai orang semenda.

### **Faktor Hamka menolak poligami**

Golongan anti poligami berpendapat bahawa memperbolehkan poligami adalah suatu tindakan yang akan meletakkan suatu halangan di hadapan wanita, di tengah-tengah perjalanan menuju kemajuan masyarakat. Sebaliknya, melarang poligami bermaksud menghilangkan sebahagian dari rintangan-rintangan yang memperlambatkan pergerakan wanita, dan merampas hak-haknya serta merendahkan kedudukannya.

### **Menjaga Keadilan**

Keadilan dalam berpoligami merupakan tuntutan dalam Islam seperti mana yang terkandung dalam firman Allah SWT pada surah an-Nisa’ ayat 3 dan ayat 129. Hamka telah

menulis di dalam tafsirnya, bagaimana kesukaran menjaga keadilan hati walaupun berlaku di kalangan mereka yang mempunyai ilmu agama yang tinggi.

### **Adat Minangkabau**

Poligami berlaku di tanah adat adalah tertakluk pada adat dan bukan kerana keharusannya dalam Islam. Mereka yang tinggal di tanah adat sememangnya akan terikat dengan adat negeri tersebut.

### **Ibu Tiri dan Pengabaian anak-anak**

Hamka menyatakan di dalam tafsirnya, nama panggilan ibu tiri bagi orang Jakarta ialah: “*Mak Kwalon*.<sup>18</sup> Mak Kwalon adalah sekadar gelaran ibu tiri bagi orang Jakarta, walaupun tidak menggelarkan dengan gelaran yang buruk pada ibu tiri tetapi mereka tetap beranggapan bahawa ibu tiri adalah jahat.

### **Kesan poligami**

Poligami membawa manfaat yang banyak kepada masyarakat, kerana membuka ruang untuk melangsungkan pernikahan bagi wanita-wanita yang sudah lanjut usia, janda dan yang telah bercerai. Sebaliknya, jika kita melarang poligami, maka akibatnya kita akan menemukan banyak wanita-wanita yang tidak berkahwin.<sup>22</sup>

### **Perbincangan**

Setelah dilihat ayat-ayat yang dibincangkan sebelum ini berkaitan dengan wanita menurut pandangan Hamka di dalam Tafsir Al-Azhar, maka disini dapatlah dikatakan bahawa Kalam Allah SWT yang diwahyukan dalam surah an-Nisa’ ini merangkumi ayat-ayat yang berkaitan dengan wanita secara komprehensif.

Hamka di dalam membicarakan hal ehwal wanita terutama dari aspek social wanita, telah menyentuh tiga aspek iaitu aspek perkahwinan, talak dan harta pusaka. Setelah diteliti, penyelidik mendapati tiga aspek ini merupakan isu sosial utama wanita dalam surah an-Nisa’ disamping beberapa isu wanita yang menjadi isu sampingan yang tidak dihuraikan secara panjang oleh Hamka.

Secara umumnya, penyelidik mendapati terdapat dua belas isu sosial wanita yang terdapat di dalam surah an-Nisa’. Isu tersebut ialah poligami, mahar, wanita berkahwin dengan Kristian, gundik, nikah mut‘ah, talak, *nusyuz*, harta pusaka, isu wanita mengubah kejadian, pengetahuan agama untuk wanita, lambat dapat jodoh, dan susuan. Secara kesimpulannya, penyelidik telah menyentuh kesemua isu tersebut di dalam bab IV penyelidik.

Perbincangan Hamka dalam perkahwinan telah menyentuh berkaitan wanita dalam poligami, mahar, perkahwinan berlainan agama, gundik dan nikah mut‘ah. Termasuk juga dalam perbincangan Hamka mengenai wanita dalam aspek perkahwinan ialah wanita lambat dapat jodoh.

Hamka membolehkan poligami dijalankan tetapi dengan menetapkan undangundang untuk kemaslahatan masyarakat, ini kerana Hamka melihat poligami yang berlaku kebanyakannya disebabkan oleh hawa nafsu dan bukannya dari syariat. Hamka juga telah menjelaskan hal ehwal yang sepatutnya dilakukan oleh suami kepada wanita jika berlaku poligami terutamanya dari sudut keadilan.

Pandangan Hamka terhadap mahar ialah mahar adalah sesuatu yang mengikut sunnah seperti mana yang telah ditetapkan dan menerima tanpa menyukarkannya. Perbincangan Hamka lebih menjurus kepada perkara yang wajib yang sepatutnya diperolehi oleh wanita ketika berkahwin iaitu maskahwin dan menghibahkan mahar oleh isteri serta menolak pendapat ahli fiqh yang mengatakan mahar ialah ganti diri kehormatan.

Perkahwinan berlainan agama, Hamka telah menegaskan bahawa wanita Islam tidak boleh berkahwin dengan lelaki Kristian kerana pimpinan rumahtangga adalah di tangan suami. Hamka juga tidak bersetuju dengan perkahwinan campur kerana ia akan membawa mudarat kepada Islam disebabkan perkahwinan campur yang wujud kini adalah disebabkan menurut hawa nafsu.

Perbincangan berkaitan gundik dan nikah mut‘ah, Hamka telah berpendapat bahawa kini yang wujud hanyalah merupakan perbuatan zina dan melanggar perempuan lacur untuk melepaskan nafsu. Ini kerana, gundik tidak lagi wujud kini dan nikah mut‘ah tidak sah menurut ijma’.

Selain perkahwinan, pemikiran Hamka mengenai talak ialah mereka yang mempermudahkan talak tidak boleh dikategorikan kepada Islam kerana bukan mengikut kepentingan agama tetapi hawa nafsu. Perbincangan Hamka termasuklah faktor yang menyebabkan berlakunya talak dan kesan talak itu sendiri dalam perkahwinan khususnya kepada wanita. Hamka dalam membicarakan soal *nusyuz*, menyatakan ia berkait rapat dengan talak. Ini kerana, berlaku *nusyuz* dalam rumah tangga boleh membawa kepada berlakunya penceraian.

Walaupun ayat-ayat dalam surah an-Nisa’ ini yang membincangkan aspek wanita tidaklah sebanyak ayat-ayatnya secara keseluruhan, tetapi aspek sentuhan kepada wanita adalah menyeluruh, iaitu bermula ia diciptakan sehingga ia hendak meninggalkan dunia ini. Ini menunjukkan bahawa Islam mengiktiraf kewujudan wanita di atas muka bumi ini sama seperti kewujudan lelaki dan sama sekali tidak ada langsung istilah diskriminasi, *gender bias*, *second Class* dan sebagainya kepada golongan wanita jika kita sama-sama menghayati ayat-ayat al-Quran yang telah dibentangkan sebelum ini. Hal ini diperkuatkan lagi dengan ayat-ayat lain yang berkaitan dengan wanita yang terdapat dalam surah-surah lain dalam al-Quran.

## Rujukan

- Al-Qardawi Yusuf (1995). *Fatwa Masa Kini*. Jilid 3 & 4. (Terj. Oleh Rosmawati Ali dan Siti Zubaidah Ismail) Kuala Lumpur: Pustaka Salam Sdn.Bhd.
- Al-Zuhaili Wahbah (2001). *Fiqh Perundangan Islam*. (Terj. Ahmad Shahbari Salamon *et al*) Cet. Pertama. Kuala Lumpur: Dewan Bahasa dan Pustaka.
- Bahrum Jamil SH (1983). *Kenang-Kenangan 70 Tahun Buaya Hamka*. Cet. Ketiga. Jakarta: Pustaka Panjimas.
- Che Zainon Yusof (1995). *Penyelewengan Wanita Menurut Pandangan Islam*. Selangor: Pustaka Ilmi.
- Hamka (1970). *Tanja jawab II*. Cet 2. Djakarta: Penerbit Bulan Bintang.
- Harun Nasution (2002). *Ensiklopedi Islam Indonesia*. Cet. Kedua. Jakarta: Djambat.
- Ibn Majah, Muhammad bin Yazid al-Qazwini (1998). *Sunan Ibn majah*. Cet. Pertama. Qahirah: Dar al-Hadith.
- Noresah bt. Baharom *et al* (2007). *Kamus Dewan*. Edisi Keempat. Cet. Kedua. Kuala Lumpur: Dewan Bahasa dan Pustaka.
- Peter A. Angeles (1981). *Sociological Research: Philosophy and Methods*. t.c. Illinois: The Dorsey Press.
- Rusydi, Afif (1990). *Hamka Membahas Soal-soal Islam*. Kuala Lumpur: Penerbitan Gerhana.
- Siti Zulaikhah Mohd. Nor (1982). *Kedudukan dan Peranan Wanita dalam Islam*. Kuala Lumpur: Angkatan Belia Islam Malaysia.
- Wan Hashim, Ting Chiew Peh dan Shamsul Amri Baharuddin (1980). *Kaedah Penyelidikan Sosial*, c.1. Kuala Lumpur: Dewan bahasa dan Pustaka.